

17. oktober 2013

UKA 2013/129
Hans Enoksen

Pisortat illuutaat A/S Ini-miit aqunneqartut suli imermut attaveqanngitsut tamarmik attavilersorneqarnissaasa pilersaarusiornissaa siunertaralugu Naalackersuisut suli-assamik piareersaasioqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Doris Jakobsen, Siumut)

Inatsisartunut ilaasortaq Doris Jakobsen Siumut siunnersuuteqarpoq pisortat illuutaat A/S Ini-miit aqunneqartut suli imermut attaveqanngitsut tamarmik attavilersornissaasa pilersaarusiornissaa Inatsisartut aalajangiiffigisassatut siunnersuut Siumumit oqaaseqarfigissavarput.

Innuttaasut sumiluunniit najugallit tamatta peqqissuunissarput inuttut ataasiakkaarluta soqutigissallugu akisussaaffigaarput pingaartumik aamma eqqiluisaarnikkut pissutsit pitsaasuunissaat inuup peqqissuunissaanut pingaaruteqarluinnartut assigiinngitsut pingaartumik imeq sapernannginnerpaamik pissarsiarissallugu tamatta soqutigisassarigatsigu.

Pisortat illuutaat sumiikkaluartulluuniit A/S Ini-miit pilersarusiorneqarnissaat ingerlanneqassapput suliassarujussuaq aallartinneqassaaq, tamannalu Namminersorlutik Oqartussat kisimiillutik ingerlassinnaanngikkaat tamatta takusinnaavarput. Kommuunit Nukissiorfillu peqatigalugit suliaq ingerlanneqartussaassaaq suliassat tamakkiisumik kivinneqassappata, aammalu nunarput tamaat angallavigineqartariaqassaaq ilaatigut imermut attavilersornissat sukumiisumik pilersaarusiorneqassappata.

Tassami imeqarfiit innaallagissamillu pilersuiffiit allineqarsinnaanerit aamma ilanngullugu misissuiffigineqarlunilu pilersaarusiorneqassapput, aammalu ilaatigut imeq errortuiffikoq soorunami maangaannaq kuutsinneqartussaaq annertoorujussuanngorsinnaasoq ilanngullugu nalilersugassaammata.

Naalackersuisut allannguutissatut siunnersuutaat pisortat inissiaataasa imermik pilersorneqarsinnaanerisa aningaasartuutissallu misissuiffigineqarsinnaanerannik saqqummiussaarnissamik siunnersuuteqarnerat annertunerusumik oqaaseqarfiginagu taperserparput Sanaartornermillu Ataatsimiititaliami suliarineqarnissaa innersuussutigalugu.